

Paulus ni surat i ntulis lan verin Timotius

Tbas afa ovi veki

Paulus ntulis surat ini verin Timotius. Timotius ini tuvmarmuri ia obin, na'uk norang Paulus ta'un ifira roak ma rfamalik Ubu Ni Ivar Lolin a (Kisah 16:3; 17:14-15; 18:5; 19:22; 20:1-6). Na'ut i Paulus ntulis surat ini, na Timotius nana'a kota Efesus, ovu Paulus nana'a propinsi Makedonia. Paulus nanovak ne, veka wol nti Efesus obin, ba ntulis surat ini verin Timotius (1 Timotius 3:14-15). Na'a ni surat ini, na ia nsinir Timotius ma nfabana lalawatan Duila'a Ni karya na'a Efesus (1:3, 18). Ia nsinir vali Timotius ma nfalak teri tamata ovi rair afa siklabir ra (1:3-11; 4:1-6). Paulus notu wean inyai, tevek na'a Efesus, na tamata boku rair afa ovi wol kena ovu Ubu Ni Ivar Lolin a. Tamata avyai rair afa ovi rtali Musa ni inukun ra, na'uk rira afa ovi rair ra wol kena (1:7-8). Ira rair tamata ra ne, Ubu veka nsikat tamata ra tali rira salasilan ra, ma rira vava'at kakiwal, wean i rot-orang inukun ovi sala ra: deka tsifa, ovu deka ta'an afamtahan ovi rfalak teri ma deka ta'an (4:1-5). Paulus nsinir Timotius ma nangal afa ovi tamata avyai rair a.

Ti ma notu munuk afa avyai, na Paulus nair Timotius ma nfabana Duila'a Ni karya ovi musti notu a. Karya avyai wean ini: Ira musti raflurut lalawatan (2:1-16). Dawan kareda rira vava'at ra musti inovan ovu tamata ovi rban-ulu na'a tamata ovi rorang Yesus rira sidovung ra (3:1-13). Ita musti rotu afa ovi rlobang vata varu ovi

rira kasian ra, ovu rlobang vali tamata liak (5:3-16). Paulus nfalak munuk afa avyai, beti nsurak Timotius, boma na'a ni vava'at a, na norang watan afa ovi kena ra (6:2-21).

Surat ini ihin a

1. Paulus ni vaivatul ovi ntulis lan a. (1:1-2)
2. Paulus nsinir Timotius ma ntab-teri tamata ovi rair afa siklabir ra. (1:3-20)
3. Paulus nfalak verin Timotius na'a vava'at i inovan verin tamata ovi rorang Yesus. (2:1-15)
4. Paulus nfalyawang na'a vava'at i inovan verin tamata ovi reluk dawan kareda. (3:1-16)
5. Paulus nsinir Timotius ma nangal afa siklabir ovi tamata ra rair. (4:1-16)
6. Paulus nair Timotius na'a i weninba ma nasusan afa ovi lolin ra verin teran a valin ovi rorang Yesus (pasal 5:1—6:2a)
7. Paulus nsurak Timotius, boma na'a ni vava'at a, na norang watan afa ovi kena ra (6:2-21a)
8. Paulus nala salam verin Timotius (6:21b)

Paulus nala salam verin Timotius

¹ Ya'a, Paulus, ususan surat ini. Ubu i ntevut dida salasilan ra, ovu Kristus Yesus i tfaklo'i a'uk dida vava'at ra verin Ia, nfareta ya'a ma eluk rasul verin Ia. ² Timotius, ususan surat ini verin oa ta baba. Oa wean yanak lalean, tevek itrua dida inorang wear isa. Fara Yamadida Ubila'a ovu Duila'a Kristus Yesus nala Ni rala lolin ovu nfaturu Ni silobang verin oa, boma mu vava'at a malinan watan.

*Paulus nfamalik tamata ovi rair afa ovi sala
ra, boma deka rorang ira*

³ Na'ut i uti propinsi Makedonia, na era verin oa ma mna'a watan kota Efesus. Tamata boku na'a inyai rair afa ovi wol mnnga'un ra, ba era ma mtab-teri ira, boma deka rair afa avyai.

⁴ Mtab-teri ira, boma deka rvatuk rira amar ra ma rfamalik tomu siklabir ra, ovu deka rfamalik daftar blawat i rfadoku uburir-nusirira ovi rmata roak veli, nararira ra rna'a. Afa avyai rotu mi tamata ra vair ma dawan ma deka rka'a Ubu Ni banbanan a. Ba fwakal verin ira ma rorang a'uk Ubu, boma rka'a Ni banbanan verin ira. ⁵ Ning snurak yai ihin a ne, fara tamata ralarira ila'a ra rmerat ovu rmalola ma rorang urun Duila'a, boma rlobang vali tamata liak ra.

⁶ Tamata boku wol rorang roak afa lolin avyai, ba rala lalawatan vaivatul ovi wol ihir lahir. ⁷ Ira inar ma rair Musa ni inukun ra ma ranovak ne, rka'a ma dawan ma rfalyawang Surat Ralan. Na'uk wol rka'a afa ovi rfalak ra.

⁸ Ita tka'a roak ne, Musa ni inukun ra lolin verin ita, wean i tfabana ma lolin inukun avyai.*

⁹ Ita tka'a ne, inukun avyai wol mane verin tamata ovi rira vava'at ra rmalola. Na'uk verin tamata ovi wol rorang Ubu ma rangal Musa ni inukun ra, tamata ovi rotu salasilan lalawatan, tamata ovi wol raraning Ubu ovu tamata ovi rfalak sian Ia, tamata ovi rfedan renarira te yamarira, ovu vali tamata sifedan liak ra. ¹⁰ Musa ni inukun ra rfalak teri tamata ovi rsifa tia ma ovu tamata ovi wol awarira verin ira, brana ovi

* **1:8** 1:8 Ita tfabana ma lolin Musa ni inukun ra, boma tamata sian ra rahil ma rtalik tali rira salasilan ra.

ka'i rsifa ovu brana, tamata ovi rbori tamata liak ra mane rfedi ira ovu tamata ovi rsiklabir. Inukun nfalak teri vali tamata ovi rala vaivatul siklabir ma al rlotar tamata, ovu tamata ovi rafena ma rorang afa kena ovi tamata rair ra. ¹¹ Afa ovi kena yai rtali Ubu Ni Ivar Lolin. Ubu Ni dawan nlia munuk, ba inovan ma tamata ra raraning a'uk Ia. Ia nala Ivar Lolin yai verin ya'a ma ufabana Ni karya.

Paulus ralan lolin, tevek Ubu nala Ni rala lolin verin ia

¹² Ufalak fara weninyai verin dida Duila'a Kristus Yesus, tevek Ia nka'a ne, orang urun Ia, ba nfile ya'a ma ufabana Ni karya. Ia nala roak ngrebat verin ya'a ma nfalak ne, ya'a veka ot-nala Ni karya, ¹³ velik ne lalan ana, ufalak sian ovu ungrihi visal-vasil Ia, ovu vali uwiuwa tamata ovi rorang Ia. Na'uk Ia nfaturu Ni silobang verin ya'a, tevek na'ut inyai wol orang Ia obin, ba wol uka'a afa ovi otu ra. ¹⁴ Duila'a nala Ni rala lolin verin ya'a ma nfangora ralang a,[†] ba orang Ia ovu ulobang tamata liak ra vali. Wean vali inyai verin tamata ovi rorang Kristus Yesus.

¹⁵ Vaivatul ovi kena lahir, ba fara tamata ra munuk veka rorang. Vaivatul ovi wean ini, "Kristus Yesus nma lanit ivavan a ma nsikat tamata ra tali rira salasilan ra, boma rira vava'at kakiwal." Ya'a ning salasilan ra rlia munuk tamata ra. ¹⁶ Na'uk wean inyai, bi Kristus Yesus nala Ni rala lolin verin ya'a. Ia notu wean inyai

[†] **1:14** 1:14 Velik ne Paulus ni salasilan ra dawan urun, na'uk dida Duila'a Ni silobang veran rahi ni salasilan ra.

ma nfaturu ne, ntahang ma dawan ralan a verin ya'a, tevek ning salasilan ra nlia munuk tamata ra. Ia ntahang ralan verin ya'a, boma tamata liak ra rsi'ik afa lolin ovi notu verin ya'a, ma veka rorang Ia ma rira vava'at kakiwal. ¹⁷ Talang ovu tfadawang Ubu. Ia Raja dawan Ia, ba Ni fareta wol ni wahan. Ia wol nmata ovu vali wol trea Ia. Ubu ikisa watan. Mya ma tfadawang naran a. Kena urun!

Paulus nala varvara verin Timotius

¹⁸ Timotius, ya'a yanak oa! Ya'a mane ala snurak verin oa: Era ma mungnanang afa ovi amar lan ana, nabi ra rfamalik na'a afa ovi veka mtuan ra na'a amar ovi veka rma. Eka mala vaivatul avyai ma reluk mu mneran, ovu mkiwal ma mangal nala tamata ovi rair afa ovi wol kena ra.[‡] ¹⁹ Morang a'uk Ubu, boma mu inorang nangrebат. Fara ralam ila'a nmerat vali. Tamata boku ralar ila'a wol rmerat, ba rira inorang nmata. ²⁰ Tali tamata avyai, na tamata irua nararira Himeneus ovu Aleksander. Ya'a ala roak ira verin nitdawan ma nwı-nwa ira, boma deka rfalak sian Ubu.

2

Taflurut verin dida dawan ra ovu tamata ra munuk

¹ Timotius, mane usurak oa wean ini. Ya'a era ma muflurut verin tamata ra munuk. Muflurut ila'a verin Ubu ma nlobang tamata ra munuk, ovu fwalak fara weninyai verin Ubu, tevek

[‡] **1:18** 1:18 Naskah asli boku rtulis vali na'a ayat ini wean ini: Ba tali vaivatul avyai, na fara morang lalawatan Kristus, ovu ralam ila'a nmerat.

nlobang roak tamata rivun. ² Muflurut vali wean inyai verin raja ra ovu dawan fareta ra munuk, boma dida vava'at ra malinan watan. Ba fara dida vava'at ra rmalola ovu talang tamata ra. ³ Taflurut wean inyai, na inyai lolin. Totu wean inyai, na nfaloling Ubu ralan a, ovu Ia nsikat ita tali dida salasilan ra, ma dida vava'at kakiwal. ⁴ Ubu inan ma nsikat tamata ra munuk tali rira salasilan ra, ma rira vava'at kakiwal, ovu Ia inan ma rka'a vaivatul ovi kena ra. ⁵ Ubu ikisa watan, ovu Tamata ikisa watan neluk leta verin tamata ra ma rti Ubu, na inyai Kristus Yesus. ⁶ Ia nala roak tenan a ma al ntevut tamata ra munuk tali rira salasilan ra. Ia notu afa yai, boma na'a amar i Ubu nfadoku a, na ita tka'a ne, Ubu inan ma nsikat tamata ra munuk tali rira salasilan ra, ma rira vava'at kakiwal. ⁷ Ba afa avyai, bi Ubu nfilia ya'a ma eluk Ni rasul. Ia nsinir ya'a ma ufamalik vaivatul ovi kena ra verin tamata ovi wol Yahudi ra, boma rorang Yesus. Afa ovi ufalak ini kena! Ya'a wol usiklabir!

Paulus nair Timotius na'a afa ovi vata ovu brana ra rotu na'a rira sidovung

⁸ Ya'a inak ma na'a inba watan misdovu mia, na era ma brana ra rsikat limarira ra ma raflurut. Brana ra musti rira vava'at ra rmalola, ovu wean i mane raflurut, na deka rsingarahi te rsingrova ira. ⁹ Ufalak vali ma wean i vata ra rung a reluk ira, na reluk kadaravit ovi inovan verin vata ra, boma rfaturu ne, rira vava'at lolin. Deka rtebung rira vut ra ma nlia da'in. Deka reluk kadaravit ovi fyawar urun, te rfaklo'i masa te mutiara na'a tenarira ra. ¹⁰ Na'uk ni lolin a, na vata ra rotu watan afa ovi lolin ra, boma

tamata ra veka rfalak ne, vata avyai rira vava'at ra rfaturu ne, rorang Ubu.

11 Wean i tamata ra rair Ubu Ni vaivatul ra verin vata ra na'a rira sidovung a, na fara vata ra rfakabava tenarira ra ovu deka rangrihi. **12** Ya'a wol utorung ma vata ra rair te rfareta brana ra. Ira musti rarenar ma lolin ovu deka vair. **13** Tevek Ubu notu lan Adam, beti Hawa. **14** Nittawan nweang nala Hawa, na Adam wahal, ba Hawa nangal afa i Ubu nfareta verin ira. **15** Velik ne wean inyai, na'uk Ubu veka nsikat vata ra tali rira salasilan ra, ma rira vava'at kakiwal na'a amar i rarali yanarira ra. Ia notu wean inyai, asal ne rorang lalawatan Yesus ovu rlobang tamata ra, ovu rira vava'at ra rmalola, ovu vali ma rtahang nal ralarira ra na'a afaka watan.

3

Paulus nfalyawang dawan kareda ovi rban-ulu verin rira sidovung ra

1 Vaivatul ovi kena urun: tamata i inan ma neluk dawan kareda i nban-ulu* verin ni sidovung a, na inan ma nkarya afa i lolin a.

* **3:1** 3:1 Vai Yunani npake vaivatul episkopos na'a ayat ini. Episkopos ihin a ne, dawan kareda ovi rban-ulu te rwanar tamata ovi rorang Yesus rira sidovung ra. Tafsiran rivun rfalak ne, episkopos ini ovu presbutterous (penatua - msi'ik 1 Timotius 4:14; Kisah 11:30) irua ihirira wer isa watan, te rfamalik van (jabatan) isa watan verin dawan kareda ovi rban-ulu te rwanar tamata ovi rorang Yesus rira sidovung ra. Terjemahan Baru na'a vai Mala npake penilik jemaat, na'uk kareda boku rpake vali uskup.

² Brana i inan ma neluk dawan kareda i nban-ulu verin ni sidovung a, na ni vava'at musti nmalola, boma tamata ra deka rfasala ia. Awan ikisa watan, ovu ntahang nal ralan na'a afaka watan, ovu vali nka'a wan. Ia musti nalang tamata ra, inan ma tamata ra rma ma rlolak ia na'a ni rahan, ovu nka'a ma nair tamata ra. ³ Ia deka nanavut, te inan ma nsingarahi, na'uk tfili tamata i nmarkai ovu wol inan ma nsingarahi, ovu vali wol wahan kubang. ⁴ Ia musti nsi'ik ma lolin ni rahan teta, ovu nair yanan ra ma ralang ia. ⁵ Tevek brana i wol nka'a ma nsi'ik ni rahan teta a, na wean inba ma nair tamata ovi rorang Yesus na'a rira sidovung? ⁶ Tamata i beti nahil ma ntalik tali ni salasilan ra ma norang Yesus, na wol bisma na'a dawan kareda i nban-ulu verin ni sidovung a. Tevek wean i neluk dawan kareda, na beta ne nfakaratat tenan a, ba Ubu veka nukun ia wean lan a, nukun roak nitdawan. ⁷ Tamata ovi wol rorang Yesus musti ralang vali tamata i inan ma neluk dawan kareda i nban-ulu. Tevek wean i wahal, na tamata ra veka rfalak sian ia ovu nitdawan veka nlabir nala ia.

Paulus nfalyawang dawan kareda ovi reluk diaken

⁸ Wean inyai vali, na dawan kareda ovi reluk diaken musti rira vava'at ra rmalola, boma tamata liak deka rfasala ira, na'uk ralang watan ira. Ira vali deka renu da'in tuat, ovu wol bisma rlobang kubang ma rfikir a'uk tenarira ra. ⁹ Ira ralar ila'a musti nmerat, ovu rtaha ma lolin afa ovi Ubu nair verin ita. ¹⁰ Ba wean i mane rlobang tamata ra na'a tamata ovi rorang Yesus

rira sidovung a, na musti rlabir teman ira veki. Wean i wol rira sala, na ki rfile ira.

¹¹ Awarira[†] vali musti rka'a warira ma tamata liak ralang ira. Deka rangrihi tia ma watan ma rfalak sian tamata ra. Ira vali musti rtahang nal ralarira na'a afaka watan, ovu rotu lalawatan afa ovi rfalak ra. ¹² Diaken ra musti rsi'ik ma lolin rira rahan teta ra, ovu awarira ikisa watan. ¹³ Tamata ovi rlobang ma lolin rira sidovung a, na tamata ra veka ralang ira na'a rira karya. Ira veka rabrahi vali ma rfamalik verin tamata liak na'a rira inorang verin Yesus Kristus.

Ita torang aka na'a dida inorang

¹⁴ Utulis surat ini verin oa, fara wol mnanat, na veka uti ma ulola oa. Velik ne wean inyai, na'uk utulis surat ini verin oa, ¹⁵ boma wean i wol uti obin ma utuan oa, tevek angangal boku, na oa bisma mka'a roak ne, dida vava'at wean inba na'a Ubu Ni sidovung. Tamata ovi rorang Yesus Kristus rna'a Ubu i nva'at Ni sidovung ini. Tamata inorang ovi rtaha vaivatul mnga'un tali Ubu rfangrebat Ubu Ni tamata ra, wean fanderen ovu liri susun ovi rfangrebat rahan a ma ndiri ma lolin. ¹⁶ Ita dida inorang nlia agama liak ra, ba wol tamata isa vali nälak nala ia. Tamata ra wol rka'a dida inorang, ti naran amar i Ubu ka'i nfavotuk ia. Vaivatul ovi rfamalik Yesus wean ini: Ia neluk tamata ma nfavotuk roak Ia,

Ubu Ni Roh nfalyawang ne, Yesus Ni vava'at nmalola. Ubu Ni sansinir ra rtali lanit ratan rsi'ik Ni ngrebat a,

[†] **3:11** 3:11 Tafsiran boku rfalak ne, Vata vali musti rka'a warira ra.

ivar i nfamalik Yesus nban-soru roak lanit ivavan. Ba tamata ra na'a inba watan rorang Ia, nata Ubu nala Ia ma nrata lanit ratan.

4

Tamata ovi rair afa ovi wol kena ra

¹ Ubu Ni Roh nfalak ma lyawan lahir ne, na'a amar ovi veka rma ini, na tamata boku veka rafena ma rorang afa ovi Yesus nair ra. Ira veka rorang a'uk afa siweang ra, ovu afa siklabir ovi nait sian ra rair. ² Tamata ovi rair afa avyai rsiklabir sian. Ira rotu ma felerira ra wean tamata ovi rorang Yesus, na'uk ralar ila'a rmata roak. ³ Ira rair tamata ra ma deka rsifa ovu deka ra'an afamtahan boku, velik ne Ubu nala afamtahan avyai ma tamata ra ra'an. Ita torang a'uk Yesus, ovu tka'a afa mnga'un ovi Ubu nair verin ita, ma tfalak fara weninyai verin Ia, beti ta'an afamtahan avyai. ⁴ Afa ovi Ubu notu ra lolin munuk, ba wol malmoli na'a afamtahan ra munuk. Ni lolin a, tfalak fara weninyai verin Ia, beti tala ma ta'an. ⁵ Tevek dida falurut ra ovu Ubu Ni vaivatul ovi tala na'a dida falurut ra rotu ma afamtahan ra rmerat.

Tamata ovi rorang Yesus Kristus ralarira wean inba

⁶ Wean i mair munuk roak afa avyai verin terad a valid ovi rorang vali Yesus, na oa veka weam tamata i nfabana ma lolin Kristus Yesus Ni karya. Oa muan kesratan, boma mu inorang ntafal, ovu mka'a roak afa ovi nair oa tali Ni Surat Ralan a. ⁷ Deka bwatuk mu amar ra na'a ubud-nusid rira tomu ovi rangal Ubu Ni

vaivatul ra. Na'uk mair tenam ovu afa lolin ra, boma mu vava'at nfaturu ne, morang urun Ubu. ⁸ Wean i tfangrebat ralad ra ovu Ubu Ni vaivatul ra ma torang Ia, na lolin lia i ts'i'ik tenadida, boma tangrebat, tevek Ubu naflahar ita na'a lanit ivavan ini ovu vali na'a lanit ratan.

⁹ Ning vaivatul avyai kena munuk lahir, ba did tinemun torang a'uk. ¹⁰ Wean inyai bi, tkiwal ma tkarya ma dawan, tevek tfaklo'i a'uk dida vava'at ra verin Ubu i nva'at a, ma nsikat tamata ra tali rira salasilan ra, ma rira vava'at kakiwal. Ia notu wean inyai verin tamata ra munuk, na'uk nsi'ik Ni tamata ovi rorang Ia nlia tali tamata liak ra.*

¹¹ Mair afa avyai munuk verin tamata ra, ovu fwareta ira ma rorang afa ovi fwalak ra. ¹² Deka msi'ik watan ma tamata ra wol ralang oa, tevek tuvmarmuri oa. Na'uk meluk banbanan lolin verin tamata ovi rorang Yesus. Ira veka rsi'ik mu vaivatul ra, afa ovi motu ra, mu rala lolin a, mu inorang a verin Yesus Kristus, ovu mu vava'at a nmalola. ¹³ Iva'um ma bwas Surat Ralan verin tamata ra. Fwalyawang Ubu Ni vaivatul ra verin tamata ra ovu msurak a mair ira. Motu lalawatan afa avyai, ti naran i uma. ¹⁴ Deka mublufang ma fwabana ngrebat i Ubu Ni Roh nala roak verin oa. Ia nala ngrebat yai verin oa na'a amar i dawan kareda ovi reluk penatua[†] rfadoku limarira ra na'a oa, ovu vali tamata boku

* **4:10** 4:10 Tafsiran ra rfalak ne, Ubu inan ma nsikat tamata ra munuk tali rira salasilan ra, na'uk nfadoku roak ma tamata ovi rorang Yesus a'uk rira vava'at kakiwal. Ubu a'uk bisma nsikat tamata ra tali rira salasilan ra, ma rira vava'at kakiwal, ovu inan ma notu wean inyai. † **4:14** 4:14 Msi'ik 1 Timotius 3:1.

na'a inyai rfamalik mu karya ovi veka motu na'a amar ovi veka rma ini.

¹⁵ Msi'ik ma lolin ma deka mublufang ning vaivatul ra. Iva'um ma morang afa avyai, boma tamata ra munuk rsi'ik ne fwabana ma lolin Ubu Ni karya. ¹⁶ Msi'ik ma lolin mu vava'at ovu afa ovi mair ra. Iva'um ma fwabana afa ovi air roak verin oa. Motu wean inyai, na Ubu veka nsikat oa ovu tamata ovi rarenar mu vaivatul ra, tali bira salasilan ra, ma bira vava'at kakiwal.

5

Snurak na'a vata varu ovu dawan kareda ovi reluk penatua

¹ Wean i mtabu tamata i ni tuvu nlia tali oa, na deka vaim dawan verin ia, na'uk mtabu ia wean i mungrahi nulu yamam a. Mungrahi verin varverun ra wean i mungrahi ovu a'am warim ra. ² Mungrahi verin itvata ra wean i mungrahi nulu renam a. Msurak vata mnelat ra wean i mungrahi nulu uram ra, ma malang ma dawan ira.

³ Malang ovu mlobang ma dawan vata varu ovi wol rira tamata roak ma rsi'ik ira. ⁴ Na'uk wean i varu isa yanan te ubun ra rna'a, na fwalak verin ira ma ka'i rsi'ik rira rahan teta ra veki, boma rka'a warira ma raval renarir-yamarira ovu uburira rira farea ra. Rotu wean inyai, na rfaturu ne, rira agama kena, ovu rfaloling Ubu ralan a. ⁵ Na'uk vata varu ovi wol rira tamata lahir ma rlobang ira, na rfaklo'i a'uk rira vava'at verin Ubu. Ovan-amar, na raflurut ma dawan verin Ubu ma nlobang ira. ⁶ Na'uk varu ovi ba'i rotu a'uk inarira lolin, ira wear tamata ovi

rva'at obin, na'uk ralar ila'a nmata roak. ⁷ Ba fwangnanang ovu msurak tamata inorang ra ma rsi'ik ma lolin varu ra, boma tamata ra deka rfasala ira.* ⁸ Na'uk tamata ovi rafena ma rsi'ik urarir-yanarira ra, te nlia tali inyai rira raham teta, na inyai nfaturu ne, rafena roak ma rorang Yesus. Tamata avyai rira sian a nlia tamata ovi wol rorang Yesus. ⁹ Wean i mane fyadoku varu nararira na'a kareda ni daftar varu ra, na musti mkya'a ne, rira varat vutnean nrata, ovu vali awarira ikisa watan. ¹⁰ Tamata liak musti rsi'ik roak ne, ia ba'i notu afa lolin, wean i notu lolin yanan ra, nsi'ik ma lolin mangun ovi rlolak ia, nfakabava tenan a ma nlobang tamata ovi rorang Yesus, nlobang tamata ovi rtuan susa ra, ovu notu lalawatan afa ovi lolin ra.

¹¹ Ba deka fwadoku varu ovi tuvmarmuri ra na'a kareda ni daftar varu ra, tevek inar urun ma rsifa ewal. Rotu wean inyai, na wol inar roak ma rfabana Yesus Kristus Ni karya. ¹² Ubu veka nukun vata varu avyai, tevek wol rot-nala tnorung i rfalak roak verin Ia. ¹³ Ira vali rvatuk rira amar ma tia ma watan ira na'a tamata rira raham ra. Ira wol mane rbosa sian watan, na'uk rfamalik a'ar tia ma watan tamata liak ra. Ira inar ma rtafal afa na'a tamata liak rira sala ra, ovu rfamalik vali afa ovi wol lolin ra. ¹⁴ Wean inyai bi, era ma varu ovi tuvmarmuri ra rsifa ewal, boma rotu duarir-yanarira ra ma rasusan rira raham teta ra, ma tamata ovi wol rorang Yesus wol rdav-nala linga'an ma rfalak sian ita.

* **5:7** 5:7 Tafsiran ra rsialing ira na'a ayat ini ihin a. Boku rfalak ne, tamata ovi rorang Yesus rira sidovung ra musti rfangnanang varu ra, boma tamata ra wol rfasala varu avyai.

15 Ufalak wean inyai, tevek varu boku wol rorang roak Yesus, ba rorang watan nitdawan.

16 Wean i vata ovi rorang Yesus rira tiniman ra rvaru, na musti rlobang ira, boma deka rotu varvara verin tamata ovi rorang Yesus rira sidovung. Rotu wean inyai, boma sidovung bisma nlobang varu ovi wol rira tamata roak ma rlobang ira.

17 Talang dawan kareda ovi reluk penatua, tevek rfabana ma lolin rira karya ra, ovu tkati rira farea ra, na tatafal nala farua. Na'uk tsi'ik lan dawan ovi rfamalik ovu rair Ubu Ni vaivatul ra. **18** Tevek Surat Ralan nfalak ne, "Wean i sapi isa nta gandum ma notu ma vatul ra rtub-aling tali kan ra, na deka mkum-teri sapi yai sumarn a ma wol na'an gandum ra."† Surat Ralan nfalak vali ne, "Tamata ovi rkarya, na inovan ma rala enarira ra."‡

19 Wean i tamata isa nmangadu dawan kareda i neluk penatua, na deka mrenar ia. Na'uk wean i tamata irua te nlia tali inyai rarea afa sala ovi notu ra, na ki mrenar ira. **20** Oa musti mtabu tamata ovi rotu salasilan ra na'a sidovung waharira ralan ra, boma tamata inorang liak ra rbobar ma deka rotu afa ovi sala ra.

21 Ufareta oa na'a Ubu ovu Kristus Yesus, ovu vali Ni sansinir tali lanit ratan ovi nfilis ra, waharira ralan a, ma morang urun afa ovi ufalak ra. Deka fwili tamata boku watan, na'uk msi'ik munuk ira. **22** Deka fwarlan da'in ma fwadoku limam na'a tamata ra ma rdoku dawan kareda. Wean i tamata ra rotu salasilan ra, na

† **5:18** 5:18 Ulangan 25:4 ‡ **5:18** 5:18 Lukas 10:7

deka morang ira. Msi'ik wam ma lolin, boma mu vava'at nmalola. ²³ Oa ba'i nawar oa, ba era verin oa ma deka menu wear vu watan, na'uk menu anggur keden a, boma nfedan suhut duan ovi rna'a evum ralan a. ²⁴ Tamata boku rira salasilan ra tamata ra rka'a roak, ba rira salasilan ra lyawan, na'uk Ubu wol nfaleka inukun verin ira obin. Tamata liak vali rira salasilan ra wol lyawan obin. ²⁵ Wean inyai vali verin ita ma trea lahir afa lolin ovi tamata rotu ra. Na'uk wean i wol trea obin, na afa lolin avyai veka rvotuk watan.

6

Snurak na'a tamata sansinir

¹ Kida, eka fwalak verin tamata sansinir ovi rorang Yesus ma ralang duarira ra, boma tamata ra deka rfalak sian Ubu naran a, ovu vali afa ovi tair ra. ² Tamata sansinir ovi duarira ra rorang Ubu, na ira musti ralang duarira ra, tevek irmunuk rorang Yesus. Fiang ini, rira karya verin duarira ra musti lolin lia lan a, tevek irmunuk duarira ra rira inorang a wear isa, ovu Ubu nlobang vali ira.

Paulus nsurak Timotius ma nsi'ik ma lolin tamata ovi rair afa ovi wol kena, ovu tamata ra deka rlobang rira metan ra

Baba, msurak a mair ma lolin afa avyai verin ira, boma rorang.

³ Tamata iki watan nair afa liak afa ovi tair ra, na ia wol norang dida Duila'a Yesus Kristus Ni afa kena ovi nair ra. Ira wol rorang vali Ni vaivatul ovi rfaturu ne, wean inba ma dida vava'at nmalola. ⁴ Tamata avyai rfakaratat

tenarira ra ovu wol rka'a akataka. Ira wearira tamata ovi inar da'in ma vair na'a vaivatul ihirira ra. Tamata ovi rarenar i vair na'a afa avyai, na ira veka rbo'itea tamata rira metan ra ma rfikir a'uk tenarira ra ovu rsingarahi sian, ovu vali rsifalak sian ira lalawatan. Ira ranovak a'uk sian ma rsituka ira. ⁵ Ira rira fikiran ra rasmotak roak, ba vair lalawatan ovu tamata liak ra, ovu vali rafena roak vaivatul ovi kena ra. Ira ranovak ne, veka rorang rira agama, boma rira metan rivun.

⁶ Na'uk tamata ovi rorang afa ovi Ubu ralan nfalak ra ovu rfikir watan ne, afa ovi rna'a ira, naran roak ma rva'at, na lolin urun verin ira. ⁷ Tevek wol tataha akataka tma lanit ivavan a, ovu vali wol tataha akataka na'ut i tmata. ⁸ Ba wean i afamtahan ovu kadaravit ra rna'a, na inyai naran watan. ⁹ Na'uk tamata ovi inar ma rira metan rivun, nitdawan nweang ira ma rotu salasilan rivun. Ira rorang watan afa sian ovi rfakeri ralarira ra, ma wora watan ira. Ira wearira awfatan i na'a sasesa ralan, na'uk wol nka'a ne, veka nmata. ¹⁰ Tevek wean i tlobang kubang, na salasilan rivun ila'a veka rabwa'ar na'a raladida ra. Tamata boku rdava a'uk kubang ma rban-talik rira inorang a. Ira rtuan afa susa rivun, ba ovan-amar rvakar watan na'a ralarira ra.

Paulus nsurak Timotius

¹¹ Na'uk Timotius, oa meluk sansinir verin Ubu, ba mufla ma fwaroa oa tali afa sian ovi ufamalik inlangin a. Morang Ubu Ni banbanan, ovu fara mu vava'at nmalola, mu inorang ntafal, mlobang tamata liak ra, mtahang nal ralam, ovu vali fwamafung mu vaivatul ra verin tamata ra.

12 Wean tamata ovi rafla silalia ma rsi'ik ne, iki utun, ba wean inyai morang ma lolin Yesus Kristus. Mkarya ovu ralam urun, boma Ubu nala vava'at kakiwal verin oa. Motu wean inyai, tevek Ubu nfili oa na'ut i fwalak ne, morang Yesus Kristus na'a tamata rivun waharira ralan ra. **13-14** Ya'a era verin Ubu i nala vava'at verin afakataka munuk, ovu Kristus Yesus i wol nfonak ralan ma nfamalik Ni vaivatul mnga'un ra verin Pontius Pilatus, ma rarenar afa i era tali oa ta baba. Era verin oa ma ralam urun ma morang lahir afa ovi ufalak roak verin oa. Motu wean ini, boma mu vava'at nmalola, ti naran i dida Duila'a Yesus Kristus veka nma ewal. **15** Yesus veka nma ewal, na'uk Ubu sa'i nfadoku amar yai. Ubu a'uk sa'i Ni ngrebat, ovu Raja dawan Ia ma ntaha fareta ra munuk, ovu vali Ni dawan nlia munuk raja ra. Duila'a Ia verin dua ra munuk, ba tamata ra raraning Ia.* **16** Ubu a'uk wol nmata. Ia nva'at na'a lyawan i nfitik nyadat a, ma wol tamata isa nfaser-nala Ia. Wol tamata isa vali bisma nsi'ik nala Ia. Ni fareta wol ni wahan, ba tfadawang a'uk Ia. Kena urun.

17 Fwareta tamata ovi rira metan rivun na'a lanit ivavan ini, boma deka rfakaratat tenarira ra, te deka rfaklo'i rira vava'at ra na'a kubang, tevek afa avyai veka rmamu watan. Na'uk ni lolin a, na tamata avyai rfaklo'i ralarira ra verin Ubu. Ia a'uk sa'i nala afa ovi rlobang ita na'a dida vava'at ra, ma ralad ra lolin watan. **18** Msurak ira ma rotu a'uk lolin a, ralarira lolin urun verin tamata liak ra, ovu inar ma rlobang tamata ra. **19** Ira rotu afa lolin wean inyai, na

* **6:15** 6:15 Ulangan 10:17, Wahyu 17: 14, Wahyu 19:16

rasdovu roak rira kesratan ra ma reluk ngrebat verin ira na'a amar ovi veka rma ini. Rotu wean ini, na ira veka rira vava'at kakiwal.

²⁰ Timotius, eka msi'ik ma lolin afa ovi Ubu nala roak verin oa. Fwaroa tenam tali ngrihi ovi vu watan ra, ovu vaivatul ovi wol ralang Ubu. Tamata ovi rangrihi vaivatul avyai rfalak ne, rka'a afa ovi rfalak ra, na'uk velik aba, wol rka'a lahir. ²¹ Tamata boku rfalak ne, rira kaka'a dawan, na'uk velik aba, wol kena. Afa yai rotu mi wol rorang roak Yesus.

Fara Ubu naflahar bir tinemun. Ning surat i utulis ini, lawan watan ini.

Ya'a Paulus, ala salam verin mia

Surat Ralan na'a Vaidida

Fordata: Surat Ralan na'a Vaidida (New Testament)

copyright © 2018 Wycliffe Bible Translators, Inc.

Language: Fordata

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

ad2f572b-0c2a-58a6-8da1-aa7be8bee2bb